

TUMA NOTA CU BRENCHE'S O'STAD HARDWARE, HOME CENTER Y ANNEX TA HABRI SOLAMENTE DI 8'OR PA 1'OR Ariba DIASABRA. MANERA CUSTUMBER BRENCHE'S PONTON, DAKOTA & SAN NICOLAS TA HABRI TE 5'OR Ariba DIASABRA.

BRENCHE'S

Ostad • Ponton • Dakota • San Nicolas
582-4250 • 588-5858 • 583-0750 • 584-5666

"Na unda abo semper ta #1"

Diez ta cay afo mañan den Sparkling Tour

Mañan ta e di dos vuelta di Sparkling Tour di e aña aki, y mi ta sigur cu e huradonan, cu dolor den nan curazon, tin cu elimina diez cantante pa e 15 otronan sigui den e concurso aki.

For di comienzo mi no kier a comenta riba e concurso aki pa motibo cu e prome presentacion aki por ta malo pa varios cu lo mester ta den e topnan y di otro banda varios cu lo tabata malo den nan ultimo ensayo lo por a mehora den nan presentacion oficial. Esey por a deduci tambe di e comentario di huradonan.

Mi tin cu bisa cu **Edjean Semeleer** parce tabata lesa locual mi memoria tabata prepara pa comenta, ya cu hopi di su comentarionan a cuadra exacto cu locual mi tabata pensando. Lagami tira un bista riba e participantenan.

"Bernadith Corpuz", cu a habri e anochi, semper mi a gusta for di chiquito, pa su **"performance"**, su bunita voz y su dominio di voz. Berdad ta cu e biaha aki den su **"I will always love you"** e tabata tin momento cu el a grita poco.

"Jaderick Croes" tambe mi a sigui for di chiquito y a goza di mire den otro genero di cancion. Mi a gusta con e tabata hunga cu su tononan halto.

Di **"Gerzon"** mi a haya cu el a bay for di tono na varios ocasion. Mi bista a keda mas riba sodo bao di su braza y **"Solankia"** mester haci algo na su tonada, specialmente na momento di tononan halto.

Naomi mi ta kere, no a saca tur cos cu e tin aden.

Mi a gusta si e cara escultural cu e tin, principalmente ora bo mira e close-up nan di television.

Justy Lopez a demostra di ta e cantante pa tene cuenta cune.

El a sali pisa e prome anochi y sigur lo keda aden despues di su **"Amor eterno"**.

Mi a gusta tambe e actuacion di **Juri Odor** den su rap.

Por fin mi a mira un rapero masculino **cu ningun momento a gara bao di su faha**.

Su cancion si tabata mucho riba un linea di comienzo te final.

Deborah Alvarez tambe tin mas aden cu el a presenta e anochi aki.

E cancion no tabata pas cu su voz. Un mitar tono mas halto lo por a yude.

Stephanie Albertus, ademas di su bunita voz **tin bunita wowo**.

Su show tabata bunita y mi lo tin gana di mira mas di dje.

Un cu a impresionami tambe tabata **Luigi Cortes** cu su salsa y bon stage performance y bon voz. Mi no ta kere cu e hurado lo kiboca y elimine.

Lionel Dorothal tabata tin problema cu tono pero el a pasa door di wowo di e hangua bibando cu su cancion.

Darrien Quandus tambe ta un cu mi a sigui for di chiquito y ta goza ora mi mira su progreso. Mi unico problema cu su presentacion tabata preocupacion pa e **no trompeca riba e hielchie halto cu e tabata tin bisti**.

Otronan cu a sorprendemi tabata **Youth Boyz**.

Nan presentacion tabata hopi bon, pero mester traha si riba nan pronunciacion.

Emeline Tromp tambe a duna un bon show pero riba su tono e mester traha un poco.

Maria Ras tambe ta un cu mi a keda encanta cune.

Bunita voz cu bon control di voz, **y e lipstick biña a keda masha atractivo**.

Gabriela Krozijndijk tambe tabata tin bon presentacion, specialmente ora cu el a kita e microfon di e stand y move, treciendo bida den su presentacion. **E ora ey mi a goza di e tatoo na su schouder**.

Un cu mi tin gana di mira atrobe ta **Vincent Tonk** cu su guitarra y sonfonia di boca. Pa mi e lo tey sigur mañan anochi. Pa e huradonan, mi no sa.

Un cu sigur mi a goza un mundo tambe ta **Griselidys Acosta**, si mi a skirbi e nomber bon. Su stage performance, su articulacion y su bunita voz sigur a pone riba lista pa actua mañan.

Genar Khouri tambe ta un cu mi kier mira mañan anochi. Mi a gusta e solo di su guitarra y e **"kuif" cu no ta di Elvis ni di Kuifje**, sigur a wordo comenta mas cu su bon voz y presentacion.

Rachel Murray tabata tin bunita presentacion pero aki y aya e tabata bay off. E ta keda den man di hurado.

Otro cu mi a gusta un mundo, principalmente con **el a mara su cabay cu su cabey**, ta **Sherryl Matos**. Bon voz, bon dominio di voz y bon stage performance tabata tin sigur. E tampoco lo ta for di e lista pa mañan.

E combinacion di voz di **Jean- Ricardo y Ivan**, e harmonia tabata suficiente pa e trio aki sigui den e di dos vuelta mayan anochi.

Mi a goza ora mi a mira **Kimberly Dijkhoff**, otro cantante cu mi ta sigui. Mi ta kere cu e hurado lo no lague cay pasobra e tabata bon pa por sigui. Mi a gusta **su bistimento rose y su boots cu strekinan rose**, masha hopi. Estilo unico!

Si **"Chiki"** mester keda afo mañan anochi e concurso a perde un atraccion. Mi a mira **Raisa** anteriormente y a goze masha hopi y den e prome anochi di e concurso, mi ta kere cu e ta un figura popular y atraccion. **Su locks cu e kraalchinan**, su dinamismo riba escenario manera ta di dje e stage ta, ta muestra su entusiasmo.

E banda **Vinyl** tabata su so, y tur indicacion ta cu nan lo sigui den e di dos vuelta tambe. Pa bisa berdad, mi a spera varios otro di e gruponan aki cu ta di nivel basta halto, y ningun di nan tabata tey.

Na tur e participantenan, suerte mañan y esnan cu ta cay afo, **"no laga esaki molestiabo. Bo a deleita e pueblo caba y ta keda awor pa bo sigui"**.

Juby Naar.